

創科研討會暨網上創新科技協作平台合作備忘錄簽署儀式

機電工程署署長薛永恒太平紳士致辭

楊局長、各位嘉賓、各位同事，各位業界朋友：

早晨！歡迎大家出席今日嘅「創科研討會暨網上創新科技協作平台合作備忘錄簽署儀式」。我衷心感謝創新及科技局局長楊偉雄先生今日親臨主禮；亦多謝多個政府及公營機構、大學、以及機電業界嘅朋友蒞臨參與，特別係遠道由廣州到來嘅廣州人力資源及社會保障局及各院校嘅好友、伙伴。我更要歡迎十二間科研機構的代表，喺今日同機電署簽訂合作備忘錄，建立策略伙伴關係，推動和支援各政府部門運用創新科技，改善服務和提升效率，期望呢個機電嘅創科聯盟，可以為香港創科發展寫下重要一頁。

機電署一直與學術界同機電業界緊密合作，向持份者推廣同機電服務有關嘅創科解決方案。喺去年六月，機電署正式啟動網上「創新科技協作平台」（E&M InnoPortal），羅列政府部門、公營機構，以及機電業界嘅服務需求，同初創企業嘅創科項目作出配對，促進本地創科發展。E&M InnoPortal 可以創造「多贏」局面。一方面，政府部門可以用最新科技提升服務質素；另一方面，大學或初創企業除了可以為它們的創新方案落地測試，還可以收集運作數據同經驗，改善方案，互惠互利。在完成試用之後，機電署亦會客觀地核證有關創科方案嘅表現；其他潛在買家就可以參考呢份政府出嘅 job reference 和實地核證嘅報告，決定是否採購同使用呢啲新科技，從而有助推動創新科技嘅廣泛應用。

為咗令創科需求同解決方案配合得當，我哋今日同五間大學同七間科研機構簽訂合作備忘錄，建立策略伙伴關係。大家會一齊參與同制訂方案，滿足 E&M InnoPortal 上嘅創科需求；亦會合辦研討會，向政府

部門介紹佢哋嘅創科成果，以及在我哋嘅機電創科專區 InnoZone 展示同機電署合作嘅創科項目。今日嘅簽署儀式將標誌住機電署與業界各主要同行者，攜手推動發展香港創新科技嘅里程碑。為咗加強創科界、機電業界同政府部門之間嘅聯繫，今日除咗舉行備忘錄簽署儀式之外，我們亦藉此機會舉辦創科研討會，希望大家都能得到啟發，係工作上可以更廣泛更有效採用創新科技。

過去一年，我哋已經舉辦了多個專題研討會及考察。稍後，我哋將會同環境局在今年 8 月在科學園合辦「綠色創科日」，為部門和業界推廣和能源效益、節能及可再生能源有關的創新科技，歡迎各位到時蒞臨支持。未來嘅創科發展有賴各方面嘅協作同支持，機電署會繼續和各持份者通力合作，係創科局嘅帶領下，發揮協調及整合嘅角色。期望透過 E&M InnoPortal 對接平台、策略性嘅伙伴聯盟、以及業界嘅協作同支持，有助開拓更廣闊嘅創科環境，為香港發展成為國際創新科技中心作出貢獻。多謝各位。

2019 年 6 月 11 日